



Ollscoil Mhá Nuad

Lárionad na Gaeilge: Taighde, Teagasc agus Tástáil Oifigeach Forbartha TEG (Post ar Chonradh Trí Bliana)

An Ollscoil

Bunaíodh Ollscoil Mhá Nuad (Ollscoil na hÉireann, Má Nuad) go foirmiúil mar ollscoil uathrialaitheach i 1997, ach téann a cuid fréamhacha siar chomh fada le bunú Choláiste Ríoga Naomh Pádraig i 1795, rud a fhágann go bhfuil breis is 200 bliain ar a cúl aici de thiomantas don oideachas agus don scoláireacht. Le scór bliain anuas, tá fás tagtha ar an Ollscoil ó thaobh scála, láidreachta agus seasaimh de. Is ollscoil í Ollscoil Mhá Nuad a bhfuil seasamh idirnáisiúnta aici sa lá atá inniu ann, agus a bhfuil cáil uirthi as feabhas agus as luach a cuid taighde agus a cuid scoláireachta, as a tiomantas don sártheagasc, as sáreispéireas foghlama a sholáthar dá 11,000 mac léinn agus mar thimpeallacht choláisteach ar leith chun tabhairt faoi shaothar scolártha.

Tosaíodh céim nua, spreagúil dá cuid forbartha faoi Phlean Straitéiseach na hOllscoile 2012-17, chun cáil idirnáisiúnta Ollscoil Mhá Nuad a dhaingniú 'mar ollscoil a bhfuil clú uirthi as a sártheagasc, a sárthaighde, a dearcadh domhanda, a páirtíocht éifeachtach leis an tsochaí a ndéanann sí freastal uirthi, agus a sainchur chuige maidir leis na dúshláin atá roimh an ardoideachas nua-aimseartha'.

Lárionad na Gaeilge: Taighde, Teagasc agus Taighde

Is aonad de chuid Scoil an Léinn Cheiltigh é Lárionad na Gaeilge, a tháinig in áit Ionad na dTeangacha agus atá ag tógáil ar an obair cheannródaíoch atá déanta san Ionad le breis is fiche bliain. Is é misean Lárionad na Gaeilge ná teagasc agus oiliúint teanga ar ardchaighdeán a chur ar fáil, a fhreagraíonn d'athruithe i gcomhthéacs an oideachais san Ollscoil féin, sa phobal a bhfreastalaíonn an Ollscoil air agus ar bhonn idirnáisiúnta. Chomh maith le bheith freagrach as teagasc na teanga do mhic léinn fochéime na hOllscoile, déantar freastal ar fhoghlaimoírí Gaeilge lánfhásta in Éirinn agus thar lear. Mar aon le scrúduithe Theastas Eorpach na Gaeilge (TEG) a riar, cuireann an Lárionad dhá shainchúrsa pháirtaimseartha ar fáil: An Diplóma Iarchéime / MA san Aistriúchán agus san Eagarthóireacht (Ar Líne), atá dírithe ar dhaoine atá ag iarraidh barr feabhais a chur ar a gcuid scileanna teanga, agus scileanna aistriúcháin agus eagarthóireachta a fhoghlaim, agus an Diplóma i Múineadh na Gaeilge (Foghlaimoírí Fásta), cúrsa praiticiúil a chuireann oiliúint ar mhúinteoirí maidir leis na modhanna múinte is nuálaí agus is éifeachtaí sa seomra ranga teanga. Cuirtear Vifax don Ghaeilge – córas foghlama Gaeilge bunaithe ar nuacht TG4, a mbíonn suas le 30,000 úsáideoir aige sa bhliain – ar fáil gach seachtain i rith na scoilbhliana.

Tá an taighde ar fhoghlaim agus ar theagasc na Gaeilge ina chrann taca d'obair an Lárionaid. Le blianta beaga anuas, táimid ag obair i gcomhpháirtíocht leis an gComhairle um Oideachas Gaeltachta agus Gaelscolaíochta agus le Coimisiún Fulbright ar thionscadail taighde a chuideoidh

linn ábhar teagaisc agus cúrsaí den scoth a chur ar fáil d'fhoghlaimoírí na Gaeilge ar fud na cruinne. Faoi láthair, tá taighde idir lámha againn ar chaighdeán na ndaltaí a bhaineann amach marcanna áirithe sa Ghaeilge san Ardteistiméireacht, ar an teangeolaíocht chorpais agus cúrsaí measúnachta, ar inniúlacht na mac léinn céime sa Ghaeilge labhartha agus scríofa, agus ar an ilteangachas.

Teastas Eorpach na Gaeilge (TEG)

Is i Lárionad na Gaeilge a dhéantar scrúduithe TEG a riar, scrúduithe agus cáilíochtaí Gaeilge do dhaoine fásta a reáchtáiltear gach bliain ar fud na hÉireann agus in ionaid thar lear. Faoi láthair, tá córas TEG á úsáid i réimse leathan institiúidí oideachais agus eagraíochtaí a bhíonn ag lorg dearbhú neamhspleách maidir le cumas sa Ghaeilge. Tá scrúduithe TEG déanta ag beagnach 4,500 duine go dtí seo. Bhronn ALTE (*Association of Language Testers in Europe*) an Q-mark ar scrúduithe TEG in 2016 chun aitheantas a thabhairt d'ardchaighdeán an chórais.

An Ról

I bhfianaise an bhorrtha agus na bhforbairtí eile atá beartaithe againn, tá Lárionad na Gaeilge ag lorg duine cruthaitheach tionscantach mar Oifigeach Forbartha TEG ar chonradh trí bliana. Oibreoidh an té a cheapfar le foireann TEG leis an gcóras a leathnú, comhpháirtíochtaí a bhunú agus tacú le páirtithe leasmhara, lena n-airítear foghlaimoírí, múinteoirí, fostóirí, taighdeoirí agus comhlachtaí earcaíochta. Beidh ról gníomhach aige/aici in eagrúchán na scrúduithe.

Riachtanach:

- Ardchaighdeán Gaeilge - TEG C1 nó B2 ard (nó a chomhionann).
- Ardscileanna eagrúcháin
- Ardscileanna ríomhaireachta
- Ardscileanna cumarsáide agus idirphearsanta
- Cur chuige tionscantach agus cruthaitheach

Inmhianaithe:

- Tuiscint mhaith ar earnáil na Gaeilge
- Taithí ar chúrsaí poiblíochta agus margaíochta
- Taithí ar fhoilsitheoireacht deisce
- Ceadúnas glan tiomána

Tuarastal

Oifigeach Riaracháin II :

€33,838 - €49,100 pa (9 bpointe)

Dóibh siúd a chuaigh isteach in earnáil phoiblí na hÉireann roimh 06/04/95, is iad rátaí tuarastail Rang D a bheidh i bhfeidhm.

* Mura bhfuil taithí ag an duine a cheapfar san earnáil phoiblí, is ar Phointe 1 ar an scála a thosóidh sé/sí.

Is féidir leis an ráta tuarastail athrú ó am go ham de réir mar a éilíonn polasaí an rialtais.

Is conradh trí bliana é seo agus cúig lá oibre sa tseachtain a bheidh á ndéanamh ag an té a cheapfar.

Iarratais

Seol CV agus litir chumhdaigh le hainmneacha agus sonraí teagmhála bheirt mholtóirí ar an ríomhphost chuig Acmhainní Daonna, recruitment@nuim.ie roimh 5.00pm, 8 Márta 2017. Cinntigh go gcuirfidh tú na focail 'Oifigeach Forbartha TEG' i líne an ábhair.